




# **Discours politique aux vrais ministres d'etat.**

<https://hdl.handle.net/1874/363108>

DISCOVRS  
 POLITIQVE  
 AVX VRAIS  
 MINISTRES  
 D'ESTAT.



A PARIS,  
 Chez PIERRE DV PONT, au Mont saint Hilaire,  
 rue d'Escoffe.

---

M. DC. LXIX.

*F. H.*

DES GOUVERNEURS  
POLITIQUE  
AVX VRAIS  
MINISTRES  
D'ETAT



A PARIS  
Chez F. LEBLANC, au Salon de la Librairie, au Palais National, ci-devant de la Nation.  
M. D. C. L. X. I. V.





# DISCOURS POLITIQUE aux vrays Ministres d'Estat.



OMME le Corps estant affligé de quelque maladie on a recours aux Medecins, afin de trouver par leur science le soulagement qu'on en espere, & la fin des maux qui le tourmentent, aussi de mesme vn Estat affligé de quelques diuisions qui sont comme des maladies interieures, recherche quelques personnes doiées des qualitez qui rendent les hommes recommandables à toute leur posterité, & qui puissent par la force del' esprit dissiper les calamitez qui les pressent.

Les douleurs qui ont tourmenté la France depuis tant d'années, & les bestes venimeuses qui depuis si long-temps s'efforçoient de la ronger iusques aux entrailles, ont donné lieu à la Maiesté de faire recherche de quelques personnes illustres en naissance & en vertu, & qui agissans sous son autorité ay puisé du secours du Ciel, & suivis des vœux de tout le monde, puissent surmonter genereusement les tempestes & les mal-heurs qui menaçoient cette Republique d'vn naufrage, assésuré.

Il est d'vn Estat ou d'vne Monarchie comme d'vn corps, lequel de nué de la vie qui le maintient n'est autre chose qu'vne masse immobile, qui d'elle-mesme ne peut agir si elle n'est animé au dedans. Cette ame des Royaumes sont ces hommes illustres qui par la force, les vns de leurs armes, & les autres de leur raisonnement, font mouoir cette grande masse qui les compose, & ce nombre infiny de peuples qui les habitent, d'avec la iustesse des mœurs, & dans vne vnion admirable; les conseruent comme l'effort de leurs ennemis, & purgent les Proninces des pestes qui les infectent: Ou tout au contraire de ces excellens personages, & de ces puissantes lumieres ils feroient autant de faux pas que le Cyclope d'Ulisse, & tomberoient à la fin dans vn labyrinthe de confusion, dont ils auroient peine de se retirer.

Le bon-heur de la France nous en a produit quelques-vns, & malgré la corruption qui afflige cet illustre Royaume, luy a conserué des Esprits dignes certes d'vne gloire immortelle, & qui peuuent rendre cet Estat aussi florissant qu'il ayt iamais paru; l'integrité de leurs mœurs, & la pureté de leurs actions sont les marques auantageuses qui les ont rendu dignes du choix que la Maiesté en a fait: Et comme la Justice est le sacré lien de la societé humaine, elle les en a rendu de po-



sitaires, & a mis ce precieux gage entre leurs mains pour en estre les iustes dispensateurs. Que seroit-ce aussi des Royaumes & des Empires sans la Iustice, sinon qu'autant de brigandages. Vn Empereur aussi sage que prudent, disoit, encores que ie puisse tout, il n'y a pourtant que les choses iustes qui me soient permises, & estimoit ce-luy-là seul digne du gouvernement, qui estoit le meilleur & le plus iuste de ceux à qui il commandoit. Cette vertu est tellement recommandable aux grands Monarques, que l'Eseriture les exhortant à leur deuoir, leur parle en ces termes. Escoutez-vous, ô Potentats, & vous autres Iuges de tous les confins de la terre, apprenez, ouurez les oreilles, vous qui gouvernez les multitudes, & prenez plaisir aux peuples des Nations : Car la puissance vous est donnée du Seigneur, & la vertu du Souuerain, lequel examinera vos œuures & fondera exactement vos pensées, pour ce que quand vous estiez les Ministres de ses Royaumes, vous n'avez pas iugé directement, vous n'avez pas obserué la Loy de Iustice, & n'avez point cheminé selon la volonté de Dieu. On voit par là comme l'ornement du Prince ne consiste pas en la seule pompe & splendeur d'une Cour, soit pour s'y faire honorer d'une grande suite de Courtisans, ou soit pour y surpasser les autres en luxe & en dépense ; Mais ce qui le rend plus glorieux & plus recommandable est la Iustice, qui est représentée par le sceptre qu'il porte en sa main. Agésilas parlant d'un Roy de Perse, qui s'attribuoit le titre de grand Roy, dit qu'il n'estoit pas plus grand que luy, voulant dire par là que les richesses & l'estenduë des pays ne font pas la grandeur d'un Roy, mais la Iustice & l'intégrité des mœurs.

C'est pourquoy ce bon & excellent Monarque Louis treiziesme d'heureuse memoire, a tousiours affecté la glorieuse qualité de Iuste, & s'en voulut reuestir dès le berceau comme d'un manteau de pourpre, & de plus glorieux ornement qu'il eust peu choisir. Et certes nous auons de quoy louer la Diuine Bonté de ce que de cette source epurée, il en a fait couler de si fauorables ruisseaux, nous ayant fauorisé de doiuer si precieux, que des personnes de la Maiesté & de Monseigneur le Duc Danjou son frere ; de ce Roy dis- ie tant de fois désiré, & demandé des François par des prieres si feruentes ; & Dieu pour comble de graces & de benedictions, a voulu adiouster à cette qualité de Iuste celle de Dieu-donné, afin que faisant reflexion sur cette grace particuliere du Ciel, il tirast de là l'origine de cette belle vertu, qu'il a fait voir aussi-tost qu'il a peu reconnoistre cette grande faueur, & dont ces liberalitez iournalieres & l'intégrité des actions, en font admirer les effets en donnant des Magistrats à ses peuples, qui possèdent les mesmes vertus qui luy sont originelles, & honorant de ces charges si releuées ceux qui en ont donné de veritables preuues, chacun doit esperer deormais du bien & de l'honneur d'un tel mini-  
Aere,



5  
sere, & se sent en soy-mesme exciter à se former sur des modeles si  
accomplis, & imiter à qui mieux mieux les belles qualitez dont ils  
esclatent; Esperons donc (chers compatriotes) de ces genereux Mi-  
nistres le soulagement des maux qui nous oppressent, & que nous  
verrons par leurs conseils releuer cet Estat, & le remettre en sa pre-  
miere splendeur, que leur exemple fera resfleuir la pieté enuers Dieu,  
l'obeyssance enuers le Prince, l'amour & la concorde entre nous, &  
le support que nous deuons esperer de leurs genereuses negociations;  
Quelle plus grande gloire pourroit aussi desirer vne ame genereuse,  
que de se voir en estat de faire du bien à plusieurs. Certes il est de ces  
courageux, ainsi portez à recommander autruy, comme de ceux qui  
possedans vne source d'eau minerale, ne la retiennent pas dans l'en-  
clos de leur maison pour leur vsage particulier, mais en distribuent  
à tout le monde, & font tout chacun participant des faueurs & du  
soulagement qu'elle peut apporter: Aussi la Maieité secondée des  
intentions de cette Auguste Reyne sa Mere, reconnoist amplement  
les seruices signalez que luy rendent ces ames genereuses, & cepen-  
dant qu'ils veillent & travaillent au bien & à l'aduancement de ses  
affaires, espouse luy-mesme leur fortune & pouruoit à l'accroisse-  
ment de leur maison par des recompenses dignes de leurs travaux:  
Considererez donc que le plus grand seruice que vous puissiez rendre  
à sa Maieité, est luy conseruer l'affection de ses suiets, laquelle ira  
d'autant plus croissant qu'ils verront leurs seruices reconnus, & que  
ce qu'ils attendent avec tant d'impatience, & promis depuis si long-  
temps sera religieusement accompli. Il est donc besoin de commen-  
cer par la recherche de ceux qui esbloüis par l'esclat de leurs richesses,  
sembloient vouloir creuer les yeux de tout le monde par l'or, dont  
ils brillent & dans le luxe où ils se sont plongez, lequel leur a attiré  
l'enuie, & depuis la haine de tout le peuple; On ne peut pas commen-  
cer la purgation d'un corps plein de mauuaises humeurs; comme est  
la France, par vn remede plus salutaire, que celuy qui regarde l'inci-  
sion d'un chancre qui alloit deuorant toutes les parties de ce grand  
Corps: Ce n'est pas que l'intention du Prince soit d'enuelopper  
l'innocent avec le coupable, estant certain qu'il y a des personnes qui  
peuvent auoir acquis du bien sans concussion ny larcin, & qui ayant  
eu à contenter les seruiteurs du Roy, leur ont donné suiet de se louer  
d'eux; on ne peut non plus accuser de crime ceux qui de profession  
mediocre ont amassé quelques biens; mais combien peu ont vescu  
d'une vie frugale, & par le mesnage de leur reuenu, ont trouué le iuste  
moyen des accroistre, sans pouuoir estre blasme de personne; aucun  
n'ignore aussi que les familles opulentes, ne soient les plus beaux or-  
nemens des Citez, & que le Prince n'en puisse estre vtilement secou-  
ru à son besoin: Mais la rigueur des Loix ne peut estre exercée, que  
contre ces champignons qui naissent en vne nuit, & quittez du



6

fumier deuiennent par trop splendides & desreglez en leur façon de viure, & dans la somptuosité de leurs bastimens ; Ce sont ces harpies qui par leur propre intrigue ou par l'entremise de leurs adherans s'approprient tout, & se partagent les recompenses des seruites d'autrui ; la conscience leur sert de partie pour les accuser, & de Iuge pour les condamner ; ce n'est pas que sa Maieité (vraye Image de Dieu) ne puisse exercer sa clemence sur ceux qui se trouueroient conuaincus de ces crimes odieux, estant vne espece de supplice d'auoir veu le coupable s'humilier, la rapine n'est pas vne lepre qui infecte seulement quelques corps, mais c'est vne corruption presque vniuerselle, & la seule conuoitise est celle qu'il entretient ; Car tel demeure les bras croisez, & vit dedans loysiueté, assure qu'il est que la plus grande vture qui puisse faire profiter son argent est le temps. Je ne m'estonne donc plus s'il y a des hommes, qui n'ont que les pas & la robe de Iustice, laquelle ils denient bien souuent à leurs propres seruiteurs, leur refusant le salaire que merite la fideité de leurs seruites, & leur inuolable fideité ; On ne peut donc esperer que toute iniustice contre les hommes, tant que les pauures & les foibles seront exposez à l'auarice insatiable de ces sangsues, qui mettent le comble de la vertu dans le grand amas de richesses, sans considerer que l'integrité de la vie & le mépris de ces fausses apparences, est le plus vray chemin que l'on doit tenir pour paruenir à la gloire des Bien-heureux.

On disoit autrefois que les Atheniens sçauoient beaucoup de bien, mais qu'ils ne le faisoient pas ; Je voudrois qu'on n'en peult dire autant des François, si ces veritables personnes ne nous promettoient vn sort plus favorable : Les membres du Corps paissant d'vne parfaite santé, quand la teste est bien saine, par ce que les nerfs qui les font agir & leur donnent l'aliment desuiuent du cerueau, aussi est il veritable que ceux qui ont l'administration de la chose publique, quand ils apportent les remedes aux playes de l'Estat blessé, font cesser les cris de ceux qui sont opprimez, & leur font supporter le mal qu'ils souffrent avec plus de patience ; sur l'esperance qu'ils ont d'vne prompte guarison, & de iouir d'vne tranquillité parfaite, sans faire come certains Medecins, qui pendant qu'ils discourent sur vne maladie, laissent si bien enraciner le mal, qu'il surmonte enfin les remedes, pour luy estre appliquez trop tard. Sa Maieité n'a donc besoin que d'estre puissamment secondez de ses plus fideles seruiteurs, c'est là ou l'on attend les effects miraculeux de cette probité, qui les a rendu dignes de ce rare choix, & qui les déroband à eux-mesme les consacre tout au public. On lit qu'il y eut iadis vn peuple de la Grece, qui ne voulut iamais redresser les ruines des Temples, que certains sacrileges auoient démolis, afin que l'horreur de leur impiété parust eternellement. Il ne faut pas en vter ainsi de la corruption qui s'est glissée comme vn serpent dans cette Monarchie, au contraire il faut espoufer si genereusement les iustes in-



7  
interests de la Patrie, que les peuples benissent eternellement ceux qui les auront deschargez de l'oppression sous laquelle ils gemissent; ils s'estimeront heureux d'auoir vescu sous vn regne, ou l'on ayt eu quelque commiseration de leur calamité; cela leur fera reconnoistre qu'on les tient pour hommes libres, & non pas nez dans vne seruitude qui tend de leur estre & leur condition egale à celle des brutes: Cette entreprise sera d'autant plus glorieuse, qu'elle n'a pour obiet que le salut & la conseruation des suiets de sa Maiesté, accablez de tant de miseres, qu'ils n'osent ouuir quasi la bouche pour plaindre leurs calamitez.

Agissez donc Ministres glorieux sous des auspices si fauorables, & soustenuz de l'autorité de vostre Roy, & des Sages aduis de cette genereuse Princesse la Reyne Regente sa Mere, afin que conspirans tous à vne œuvre si Saincte, la France se puisse vanter qu'elle a des hommes, qui despoillez de tous interests particuliers n'ont rien de plus recommandable que la guerison du mal qui la presse. Cela ne se pourra peut-estre faire sans murmure & sans encourir la haine de quelques-vns; mais c'est le propre des grands personnages d'auoir également des meschans pour ennemis, & des gens de bien pour admirateurs de leur vertu, Hercule (disent les Poëtes) eut l'enuie pour nourrice, afin qu'il s'accoustumast dès l'enfance à reietter tous ses traits enuimez, pour acheuer plus heureusement les heroïques conquestes qui luy estoient destinées, lors qu'il auroit atteint l'age d'homme. Dauid ce sage Roy, & le vray exemplaire des Roys Chrestiens, tenoit pour tomble de grace & de benediction, de voir dans son Estat la Paix & la Iustice se donner le baiier de concorde. Puissiez-vous aussi faire fleurir pendant de longue années l'vne & l'autre parmy nous, afin que les bouches des bons François ne soient plus occupées qu'en des acclamations de ioye, & en des applaudissemens & benedictions pour ceux qui leur auront procuré vn si signalé bon-heur: Ainsi toutes choses remises dans leur splendeur, & iouyssons tous d'vne tranquillité si souuent troublée par tant de diuisions, & alterez par tant de guerres & d'oppressions, cette Monarchie aille surmontant tous les Royaumes de la terre.

F I N.



*[Faint, mostly illegible text, likely bleed-through from the reverse side of the page. The text appears to be organized in paragraphs.]*

F. I. M.

*[Faint, mostly illegible text at the bottom of the page, possibly a signature or reference.]*